

Fundacion Juan Mario Odor a otorga plakkaat di aprecio y estimulo,

Sigur un bunita forma pa aprecia y reconoce trabao di otro

STA. CRUZ -- Riba 18 di Maart Fundacion Juan Mario Odor a otorga plakkaat pa reconoce trabao di dos persona y un otro fundacion cu tambe ta trahando pa proteccion di Aruba su cultura. E prome persona cu a ricibi su plakkaat tabata Sr. Ito Tromp. Su plakkaat ta pa reconoce su empeño pa trece tur su alumnonan di Papiamento pa Museonan. E idea di Sr. Ito Tromp pa cu esaki ta cu e no kier solamente siña e personanan aki nos idioma pero tambe laga nan wak y siña algo di nos cultura y nos historia. Mayoria di su alumnonan ta personanan cu ta bin for di exterior pa traha aki na Aruba y ta interesa pa siña nos idioma Papiamento. Pero cu Sr. Ito Tromp nan ta siña mas cu Papiamento. Sr. Ito Tromp ta usa su tempo liber pa siña e personanan aki mas di Aruba. Con leu abo ta bay pa siña personanan di exterior nos dushi Papiamento? Bo ta haciendo suficiente? Bo ta papia Papiamento cu tur hende cu ta traha aki na Aruba? Paso un bez un persona ta traha y biba riba nos dushi baranca nan mester por acepta e echo cu nos ta

Arubiano y Papiamento ta nos idioma. Si un persona ta biba na Aruba pa varios aña y e no por papia Papiamento ta paso e mes no kier.

Nos no mester laga ningun idioma pasa riba nos Papiamento paso cu nos por papia Spaño y Ingles ta un casi 'don' di nos Arubianonan y no laga hende haci mal uso di esey. Pesey personanan cu pensamiento manera Sr. Ito ta importante pa nos pais y conservacion di nos Papiamento y nos historia. Plakkaat entrega pa Sr. Ruben Odor. E segundo plakkaat a ser otorga na Sra. viuda Ines Odor. Sra. Ines tin mes hopi tempo ta colecciona Antique cu su defunto esposo Sr. Juan Mario Odor.

Un persona cu ta stima Aruba masha tanto y tabata cana na pia den tur skina di Aruba pa asina logra haña mueble, obheto, herment, santo y piedra di Aruba. Ainda awo na un edad haltu e no por stop di purba warda y restaura antique di Aruba. Ademas di colecciona antique e ta un coleccionista activo di placa. Su opinion hunto cu



esun di poeta y numismatico Ruben Odor ta clave pa tur cambio of compra di placa pa e Museo Numismatico Aruba. Plakkaat entrega pa Sra. Raquel Maduro-Odor. E di tres plakkaat a ser otorga na un fundacion ruman, o sea un fundacion cu tambe ta trahando duro pa yuda conserva cultura di Aruba:

Fundacion Mi Cutisa. E fundacion aki ta esencial paso nan tambe ta investiga y trata na salvaguardia diferente aspecto di nos cultura.

Esaki ta e miho forma pa traha: hunto y uni pa cumpli cu e mesun meta. Fundacion Mi Cutisa a haci acto di presencia den trahe

di antaño y por a ripara cu esaki a haci un efecto emocional riba hopi persona pa mira nos grandinan como tambe mas hoben bisti den paña tradicional. Hopi hende local y turista a probecha e oportunidad aki pa saca potretan hopi bunita. Plakkaat entrega pa Sr. Victor Rasmijn.

